



Broj: UP-I-KSI-09-16/23

Datum: 26.05.2023. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po anonimnoj prijavi od 06.03.2023. godine, u predmetu utvrđivanja povrede odredaba navedenog Zakona od strane Z.N. iz Brčkog, ulica [REDACTED] broj [REDACTED], gradonačelnika Brčko distrikta Bosne i Hercegovine, kao nosioca javne funkcije, na 56. sjednici održanoj dana 26.05.2023. godine, donosi

### RJEŠENJE

1. **UTVRĐUJE SE** da je Z.N. iz Brčkog, ulica [REDACTED] broj [REDACTED], kao nosilac javne funkcije, zastupnik u Skupštini Brčko distrikta Bosne i Hercegovine do 15.03.2023. godine, a od 15.03.2023. godine obavlja funkciju gradonačelnika Brčko distrikta BiH, za vrijeme obavljanja funkcije poslanika u Skupštini Brčko distrikta Bosne i Hercegovine postupio protivno članu 8. stav (1) Zakona o sprečavanju sukoba interesa u institucijama Brčko distrikta Bosne i Hercegovine, na način da je propustio da na drugo fizičko ili pravno lice prenese upravljačka prava udjela u kapitalu privatnog preduzeća „[REDACTED]“ d.o.o. Brčko distrikt Bosne i Hercegovine, u kojem nosilac javne funkcije ima više od 0,5% udjela u kapitalu preduzeća, odnosno 100% vlasništva i upravljačka prava.
2. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, Z.N. se shodno članu 39. stav (1) tačka b) navedenog Zakona izriče novčana kazna, i to obustavom dijela isplate neto mjesečne plate, koju nosilac javne funkcije prima za obavljanje javne funkcije u iznosu od 10% (deset posto) neto plate.

### Obrazloženje

Dana 06.03.2023. godine Komisija za odlučivanje o sukobu interesa je zaprimila anonimnu prijavu protiv Z.N., u kojoj se navodi da Z.N. nije podnio ugovor o prenosu upravljačkih prava u privatnoj praksi koje ima u PZU „[REDACTED]“, a što se primijeti nakon izvršenog uvida u Izvještaj o imovinskom stanju nosioca javne funkcije u Registru imovine koji vodi Komisija. Nadalje, u prijavi se navodi da, ukoliko bude obavljao funkciju gradonačelnika Brčko distrikta Bosne i Hercegovine, isti ne može istovremeno obnašati dvije funkcije, i funkciju doktora i gradonačelnika, pa se predlaže da se i protiv njega provede postupak utvrđivanja povrede odredaba Zakona.

U skladu s navodima iz anonimne prijave, Komisija za odlučivanje o sukobu interesa je Zaključkom, broj: UP-I-KSI-09-16/23 od 09.03.2023. godine pokrenula postupak protiv Z.N.

Nosilac javne funkcije je istim Zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja Zaključka.

Nakon prijema Zaključka o pokretanju postupka, broj: UP-I-KSI-09-16/23 od 09.03.2023. godine, zaprimljen 17.03.2023. godine, Z.N., nosilac javne funkcije je dana 22.03.2023. godine dostavio Komisiji za odlučivanje o sukobu interesa pisano Izjašnjenje u kojem, između ostalog, navodi da je postupak pokrenut dok je obnašao funkciju poslanika u Skupštini Brčko distrikta Bosne i Hercegovine, a da je Odlukom Skupštine Brčko distrikta Bosne i Hercegovine o izboru gradonačelnika, broj: 01-02-1102/2023 od 15.03.2023. godine izabran za gradonačelnika Brčko distrikta Bosne i Hercegovine, te mu je prestao mandat poslanika u Skupštini, te s tim u vezi smatra da su prestali i razlozi za pokretanje postupka i smatra da postoje razlozi da se postupak obustavi. Osim toga, Osnovnom sudu Brčko distrikta Bosne i Hercegovine-Registru preduzeća je podnio zahtjev za promjenu upisa poslovnog subjekta PZU „[REDAKCIJA]“ Brčko, a kojom promjenom je izvršen prenos upravljačkih, osnivačkih prava kao i pravo zastupanja u navedenom subjektu, jer se kao vlasnik, lice ovlašteno za zastupanje pojavljuje drugo lice.

Kao dokaz priložene su: kopija Odluke Skupštine Brčko distrikta Bosne i Hercegovine o izboru gradonačelnika Brčko distrikta Bosne i Hercegovine, broj: 01-02-1102/2023 od 15.03.2023. godine i Prijava za registraciju Osnovnog suda Brčko distrikta Bosne i Hercegovine-Registar preduzeća od 20.03.2023. godine.

Z.N. je na osnovu Uvjerenja Centralne izborne komisije Brčko distrikta Bosne i Hercegovine, broj: 06-1-07-01-2103-2-3199/20 od 15.12.2020. godine obnašao funkciju poslanika u Skupštini Brčko distrikta Bosne i Hercegovine do 15.03.2023. godine, kada je Odlukom Skupštine Brčko distrikta Bosne i Hercegovine o izboru gradonačelnika Brčko distrikta Bosne i Hercegovine, broj: 01-02-1102/2023 od 15.03.2023. godine izabran za gradonačelnika Brčko distrikta Bosne i Hercegovine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Članom 22. Poslovnika o radu Komisije za odlučivanje o sukobu interesa u institucijama Brčko distrikta Bosne i Hercegovine propisano je da je nosilac javne funkcije stranka u postupku u smislu ovog Poslovnika.

Članom 8. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije koji ima 0,5% (nula zarez pet posto) i više dionica, odnosno udjela u kapitalu privatnog preduzeća za vrijeme obavljanja javne funkcije, ugovorom prenosi upravljačka prava na drugo pravno ili fizičko lice u roku od 30 (trideset) dana od dana stupanja na javnu funkciju, koji upravljačka prava vrši u svoje ime, a za račun nosioca javne funkcije.

Prilikom preduzimanja postupka redovne provjere podnesenih Izvještaja o imovinskom stanju, Komisija za odlučivanje o sukobu interesa je dana 09.12.2021. godine pod brojem KSI-12-82/21 uputila Obavještenje nosiocima javne funkcije o pravima, obavezama i odgovornostima koje imaju sa stanovišta Zakona o sprečavanju sukoba interesa u institucijama Brčko distrikta Bosne i Hercegovine u kojem je navela i član 8. Zakona a koji se odnosi na prijenos upravljačkih prava.

Nadalje, Komisija se dana 27.09.2022. godine obratila Osnovnom sudu Brčko distrikta Bosne i Hercegovine-Registar preduzeća sa zahtjevom za dostavu podataka da li se u evidenciji Registra preduzeća kao osnivač ili lice ovlašteno za zastupanje registrovanog pravnog lica, odnosno kao samostalni preduzetnik pojavljuje Z.N., nakon čega je dana 09.11.2022. godine uvidom u dopis i Izvod Registra preduzeća, broj: 096-0-RegZ-22-003178 od 09.11.2022. godine utvrđeno da je kao osnivač i lice ovlašteno za zastupanje u PZU „[REDAKCIJA]“ Brčko distrikt BiH upisan Z.N.

Primjenom navedenih zakonskih odredaba na utvrđeno činjenično stanje, ocijenjeno je da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine u konkretnom slučaju, s obzirom na to da Z.N. nije za vrijeme obavljanja funkcije poslanika u Skupštini Brčko distrikta Bosne i Hercegovine, odnosno od stupanja na snagu

Zakona o sprečavanju sukoba interesa u institucijama Brčko distrikta Bosne i Hercegovine postupio u skladu s odredbom člana 8. stav (1) Zakona, odnosno prenio upravljačka prava na drugo s njim nepovezano lice.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 39. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju, u obzir uzela sve otežavajuće i olakšavajuće okolnosti kako bi izrečena sankcija u potpunosti odgovarala učinjenoj povredi Zakona. Kao otežavajuće okolnosti, Komisija je cijenila činjenicu da je Z.N. u vrijeme donošenja Zakona o sprečavanju sukoba interesa u institucijama Brčko distrikta Bosne i Hercegovine obnašao funkciju poslanika u Skupštini Brčko distrikta Bosne i Hercegovine, te je s tim u vezi bio upoznat, odnosno morao imati saznanja o svim pravima i obavezama koja proizilaze iz Zakona. Nadalje, Komisija je cijenila činjenicu da nosilac javne funkcije nije postupio shodno Obavještenju Komisije od 09.12.2021. godine. S druge strane, od olakšavajućih okolnosti, Komisija je cijenila činjenicu da je nosilac javne funkcije nakon prijema Zaključka o pokretanju postupka preuzeo aktivnosti na otklanjanju nepravilnosti, odnosno postupio je u skladu sa zakonskim odredbama. Imajući u vidu sve naprijed navedeno, odlučeno je da se izrekne novčana kazna obustavom dijela isplate neto mjesečne plate, koju nosilac javne funkcije prima za obavljanje javne funkcije u iznosu od 10% (deset posto) neto plate kako je to navedeno u stavu (2) izreke rješenja i da ista u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 39. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

#### **POUKA O PRAVNOM LIJEKU:**

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik  
Komisije za odlučivanje o sukobu interesa

---

Admira Mujić, dipl. pravnik

#### Dostavljeno:

1. Z.N., [REDACTED], Brčko distrikt BiH,
2. Internet stranici Komisije,
3. Evidenciji i
4. Arhivi.

